



臣朱壽朋敬編

臣沈彭年恭校

秋七月己卯朔時享 太廟遣奕諒恭代行禮○庚辰諭給事中鄧承修奏已故戍員戰功卓著請量予

褒卹一摺已革前任總兵降補都司陳國瑞隨同僧格林沁轉戰數省曾著勞績嗣緣案遣戍上年傷發身故著加恩開復總兵原官並將戰績宣付國史館以獎前勞該衙門知道○諭昨據給事中鄧承修奏已故戍員陳國瑞請予褒卹一摺並非迫不及待之事輒於花衣期內呈遞殊屬不諳體制鄧承修交部議處○癸未清安奏查科布多屬扎哈沁游牧迄南杜蘭哈喇地方舊有鉛砂鑛廠前於嘉慶年間因邊徼情形不甚相宜奏奉 諭旨嚴行封禁至咸豐八年間據烏魯木齊都統倭什琿布奏請招商試辦當經科布多參贊大臣麟翔奏明該處僻在邊隅幅員遼闊竊恐匪徒藏匿偷挖鉛廠甚或滋生事端諸多窒礙請仍遵照成例封禁並於每年雪融冰泮之後科布多巴里坤二城各派委員巡查等因歷經辦理在案今屆巡查會哨之期前已咨明烏魯木齊巴里坤各派員前赴該處會查鉛廠惟據巴里坤來咨內開近來餉項支絀差煩兵苦盤費難籌未能派員前往會哨等因前來奴才當卽差派委員松祥前往

該廠會同坐卡官兵詳細搜查有無匪徒藏匿偷挖鉛砂情形務當據實稟覆茲據該委員松祥稟稱查得杜蘭哈喇鉛廠內並無偷挖鉛砂之人亦無來往蹤跡並囑令該卡官兵認真巡查勿得稍涉疏懈等情稟報前來除由奴才飭令署扎哈沁公印務扎蘭阿育什轉諭駐卡官兵等必須嚴加看守不時稽查外理合具奏報聞○甲申諭張樹聲奏請調員差委一摺已革兩淮鹽運使洪汝奎著發往廣東交張樹聲裕寬差遣委用○丙戌諭順天直隸所屬窪區向苦積潦近來雨水過多加以山水暴發低田更難涸復小民失於耕種困苦實深朝廷軫念窮黎亟應預籌撫恤此次江北糧米除撥抵山東賑需五萬石外尚有米六萬六千七十餘石現已運抵天津著李鴻章就近截留督飭各屬查明被災輕重分別核實散撫務使實惠及民毋任官吏稍有弊混用副廛念民艱至意其隨漕輕費等項銀款並著飭令該糧道解交直隸津貼運費○丁亥諭護軍統領德福奏拿獲開設烟館人犯請交部治罪一摺太監閔連成等膽敢在紫禁城內開設烟館亟應從嚴懲治所有拿獲之太監閔連成民人索兒均著交刑部嚴行研訊按律懲辦其未獲之太監尙道詣民人李二著步軍統領衙門順天府五城御史一體嚴拿務獲歸案訊辦○戊子 上詣 奉先殿行禮○諭軍機大臣等雲南素產五金乃天地自然之利該省銅政久經廢弛本應整頓規復以資鼓鑄而利民用此外金銀鉛鐵各礦亦復不少自宜早籌開採以廣中土之利源實

爲裕國籌邊至計惟經費較鉅籌款維艱近來各處開採煤礦皆係招商集股舉辦較易若仿照辦理廣招各省殷實商民按股出資與官本相輔而行則衆擎易舉事乃克成前據岑毓英奏整頓銅務章程五條業經戶部議復准行昨據署左副都御史張佩綸奏稱招集商股開採滇礦爲富強本計不爲無見岑毓英唐炯身膺疆寄於滇礦務必能留意請求實心經畫著卽詳細會商妥速籌辦新任藩司龔易圖到後並著飭令將籌款招商等事妥爲經理總期事在必行毋得視爲不急之務日久辦無成效坐失事機至各處礦苗應如何先行相度或仍應購買外洋機器以利開採均著豫爲籌議一俟款項集有成數卽可尅期興辦不致遲誤張佩綸原片著鈔給閱看將此由四百里各諭令知之○諭錢法爲民用所關私鑄私銷大千例禁現在近城一帶多有匪徒銷燬官錢改鑄漁利以致私錢充斥亟應嚴拿懲辦著步軍統領衙門順天府五城御史一體嚴密查拿務獲按律懲治以重圖法○文海奏今日之時勢需才孔殷而操用人之權者每有乏才之歎推原其故總由人心不正風俗日漓以中上之資無由觀感奮興日習於巧滑而不足以任事今欲人才繼起惟有正人心厚風俗以爲培養人才之本其所以正人心厚風俗者約有數端敬爲我皇太后皇上陳之一杜徇情中外大臣皆有以臣事君之義豈不知舉直錯枉職所當爲乃往往於情面所關私心頓起或遷就於同寅或迴護於權要以致見賢不能舉見不賢不能



卽退皆此瞻徇之一念有以誤之耳然誤己卽以誤人有志之士心懷不平勢必甘爲韜晦無能之輩因  
而趨阿反得以之濫竽驅人品於下流莫此爲甚於人情風俗所關豈淺鮮哉相應請 旨飭下內而大  
小臣工外而督撫司道力杜徇情之習一秉大公庶人才日有起色矣一抑奔競各部各省屬員過多人  
浮於事遇有差委恐後爭先必爲大吏者果能憑公選派舍其短而用其長練其才而成其德孰不爭相  
砥礪以邀有道之賞識乎乃近來捷足者可以先登夤緣者可以倖進人心風俗逼人至此於此欲得真  
才真才豈可得哉宋程頤云大賢居位卻不求人而使人倒求己是甚道理又云祇爲有不求者不與來  
求者與之遂致人如此審是則奔競之門自大吏開之相應請 旨飭下中外大臣凡遇屬員之升遷調  
轉以及派委差使如有當面干求及轉人囑託卽擯斥不用庶奔競之風可以永絕而人才可以振興矣  
一勵廉恥周禮曰六事以廉爲本孟子曰恥之於人大矣哉是廉恥兩字關於人心風俗尤當亟亟請求  
也向來京官不貴應酬從不與該管上司送禮近聞各部院司官頗有與堂官送節壽禮者不可不防其  
漸外官節壽陋規大半裁去改爲津貼辦公立法極爲美善近聞各省於津貼辦公之外復有巧取名目  
不曰節壽而實無異於節壽者殊堪痛恨相應請 旨飭下部院大臣如屬員饋送禮物非親戚故舊向  
有往來者卽指名參奏各省督撫嚴飭所屬如奏明有津貼辦公再隱取節壽陋規者亦指名參奏庶廉

恥之道存而純正之才著矣又奏各部院司員見該管堂官向不准屈膝請安歷奉 諭旨甚明伏讀乾隆二十八年奉 旨禮義廉恥居官者立身之要雖不可妄行驕縱亦不可自處過卑以爲取悅上官之計著通行曉諭侍衛部屬接見本管官俱照舊例侍立回事卽自行問候不過鞠躬致意已足達情盡禮等因又嘉慶八年奉 旨侍衛部院司員於本管堂官接見禮儀自有定分遇有公事祇應侍立回堂毋許屈膝請安以肅體制而杜諂諛等因欽此又十年奉 旨嗣後侍衛部院滿漢司員務當懷遵定例各知自愛倘再向該堂官屈膝請安該堂官據實劾奏倘徇隱不言致被科道糾參必將該堂官一併議處等因欽此仰見 列聖造就人才之意至深且遠乃煌煌 諭旨各部院竟有不恪守遵行查上年戶部尙書閻敬銘到任後卽傳諭戶部滿漢司員不准請安一時尙氣節者歡欣鼓舞出而圖功雖大吏爲國求賢不僅在此一節而卽此一節亦足以轉移風氣而正取士之源應請 飭下各部院大臣遵照歷奉 諭旨轉飭該屬員等一併恪守永遠遵行以維風化而敦人品 上諭御史文海奏請正人心厚風俗以培養人才各摺片中外大臣於所屬各員自當量才任使秉公舉錯據稱近來往往瞻徇情面致啟夤緣倖進之風於官方吏治殊有關繫嗣後各部院衙門堂官各直省督撫凡遇屬員升遷調補以及派委差使務當破除情面悉心遴選以杜奔競而勵人才至屬員餽送節壽禮物向有明禁中外大臣自應

嚴加屏絕嗣後如有餽送禮物及巧立名目隱取陋規者卽著據實參奏至各部院司員見該管堂官向不准屈膝請安著該堂官等懷遵乾隆嘉慶年間歷次欽奉諭旨飭令該屬員等恪守遵行以肅體制

○諭恩福奏熱河地方被水拯救災黎情形一摺據稱六月下旬連日大雨山水暴注迎水壩等處衝塌房屋甚多災黎無所棲止現經設法拯救等語小民猝遭水患蕩析離居殊堪憫惻著恩福會商李鴻章趕緊籌款撫恤並將漫溢積水設法疏濬務使貧民復業毋任一夫失所○諭翰林院侍讀陳學棻奏山東現辦賑捐請飭頒發監執照並准捐輸米穀照銀抵算一摺著戶部議奏○諭載卓等奏估修未修工程現查續有情形一摺泰陵寶城磚塊續有賊閃情形著派徐用儀前往敬謹查勘具奏又奏河中衝刷橋梁道路請派大臣查勘一摺著徐用儀一併敬謹查勘奏明辦理○伊犁參贊大臣升泰科布多幫辦大臣額福與俄國分界大臣巴布闊福及撤裴索富在喀巴河賽里烏蘭奇巴爾會議科布多界約五條成○己丑諭游百川陳士杰奏外委搶險捐軀懇恩優恤等語千總銜候補把總山東齊東汛經制外委金玉璽於本年六月間因齊東縣東關外堤壩被黃水衝激異常險要該外委冒險搶工被溺殞命深堪憫惻著交部照軍營陣亡例從優議卹○湖北提督傅振邦卒賜卹如例○辛卯諭軍機大臣等岑毓英等奏添募勇營扼紮越南要隘一摺法越構兵未已滇邊防軍自應加意扼守第法人並未與我失

和我軍總以剿辦土匪爲名未可顯露助戰之迹致敗衅端據奏山西城逼近江邊輪船在江中礮彈可及萬一法船上駛彼時我軍進止殊多窒礙岑毓英唐炯務當統籌全局相機布置俾法人有所顧忌而不致藉爲口實方爲妥善○諭都察院奏編修尹琳基等聯名以已故總兵遺愛在民請准建立專祠據呈代奏一摺陳國瑞前經降旨開復原官宣付國史館立傳著再加恩准其於山東立功地方建立專祠以順輿情○壬辰劉秉璋奏五月二十九日欽奉 上諭有人奏台匪金滿乞撫經台州紳民公具保狀該撫已准令投誠等語所奏各節有無其事著卽行奏聞等因欽此當將辦理情形附片奏明在案旋於六月十二日接據署台州府知府郭式昌稟稱據管帶越軍中營舉人王右人稟金滿金守龍悔過自新情願投効立功贖罪該舉人於六月初二日前往點名察其悔罪情切當經逐一點驗冊造百名作爲越軍新中哨以金滿爲正哨弁金守龍爲副哨弁以資督率該首民等感泣圖報立功自贖等情經臣秉璋批飭該府會同統領溫台各軍記名提督楊岐珍親往點驗後編成一哨歸入越軍中營交舉人王右人約束操練恪守營規立功自効以贖前愆並據舉人王右人稟同前由六月十二日該署府郭式昌前往點名金滿率同諸人沿途跪接感激涕零自願力圖報効察其所留百名皆年力強壯堪以錄用並據提督楊岐珍轉據王右人稟稱是月十七日金滿派人拏獲要匪程老二一名送官究辦是其立功自贖具



有天良等語又經批飭台州府將該犯程老二訊供懲辦在案以上係辦理收撫分別安置之實在情形也臣等伏查爲治之道總以安輯地方俯順輿情爲最要金滿一犯稔惡多年罪無可追而人係土著民患切膚該郡紳民情關桑梓以其悔罪有心因勢利導挽出廩生謝夢蘭來省先赴兵部尙書彭玉麟行館叩謁直陳允其轉向臣秉璋商酌辦理以彭玉麟之威信素著聞其一言許可不但謝夢蘭深以爲榮卽台郡士民莫不歡忻鼓舞而金滿投誠之說通省皆知且以上達宸聰臣秉璋亦以彭玉麟老於軍事成竹在胸此舉無非爲綏靜地方起見瀕行函中並有不可失信之語是以不揣冒昧仰體 皇仁好生之德開其一綫用示法外之仁經舉人王右人前山東臨邑縣知縣賀璠武生戴榮哨官陶錦華江西候補知縣徐春榮往返開導察其情真始准率衆來營及時自効所帶之人僅止一百名業已點驗入冊歸入越軍中營加以訓練俾就範圍亦無他虞以後附近地方再有搶刦之案卽責成金滿隨時緝捕以期得力現在事已就緒合無仰懇 天恩網開一面 俯准金滿留營効力以順輿情而安地方實爲幸甚臣等蒙 恩深重斷不敢苟且目前自當隨時留心察看以弭後患 上諭前因浙江台州土匪金滿糾黨滋事迭經嚴諭該督撫派兵剿辦茲據何璟劉秉璋奏該匪悔過自新情願立功贖罪由台州紳民稟請彭玉麟轉商劉秉璋具奏乞恩懇准留營効力等語金滿稔惡有年種種不法核其罪狀實屬死有

餘辜本應立正典刑以伸國法惟朝廷除殘去惡無非爲綏靖地方安輯良民起見既據奏稱真心悔悟率衆來營並拿獲要犯送官究辦以抒其畏罪自贖之誠而該郡士民又爲瀝情懇請尙可網開一面以示法外之仁金滿著從寬免死准其留營効力金守龍及餘衆百人均著照所議一併留營責令帶罪自効該督撫務當隨時嚴加約束如再有不法情事定當從重懲辦並惟彭玉麟何璟劉秉璋及該紳士等是問○署吉林將軍副都統玉亮卒賜卹如例○癸巳 上詣 奉先殿 壽皇殿行禮○諭畢道遠周家楣奏順天府屬被水情形亟籌拯濟一摺據稱本年雨澤過多河水漫溢通州等州縣所屬村莊田廬被淹並有傷斃人口現在分別察勘等語京畿一帶地方被災甚重小民蕩析離居情形困苦朝廷實深廑念著李鴻章畢道遠周家楣迅速籌款派委委員前赴災區詳細查明妥爲賑撫務使實惠及民毋任一夫失所用副軫恤災黎至意○張夢元奏臣於四月初三日到工任事查接管案內光緒八年十一月前督辦船政黎兆棠任內接奉戶部奏定外省報銷章程第十四條內稱各省設立機器局並閩廠船政局購買輪船機器外洋鎗礮電綫等件日新月異名目不一耗費尤多既無定例可循部中無憑稽核應請 飭下南北洋大臣及設立機器局各省督撫暨船政大臣總計常年經費若干如有添購機器經費若干雖不能限以定數亦當立以範圍事前奏明報部立案事後方准核銷等因現黎兆棠業經開去差

使臣查船政常年用數視閩海關解欸爲衡解欸足則工程緊而用數多解欸不足則工程緩而用數少  
量入爲出不能預定情形其添購機器一節自應隨時奏咨立案茲據提調道員呂耀斗稟稱現辦六年  
至八年前督辦船政黎兆棠任內銷案除已經奏明有案及例支各欸外尚有添置機器各欸應行照章  
聲明者一爲添置各廠機器添造各廠水缸爐座之欸此欸因年來製造船身並輪機水缸均有加大故  
各廠機器爐座有不敷用之處隨時由廠添配計添製機器約用銀二萬一千五百餘兩添造水缸爐座  
約用銀四千七百餘兩一爲修理鐵船槽並機器房之欸此項因歷年久遠其木鐵件及機器等項不無  
損壞船槽爲修船所必需自應興修約用銀一萬三千五百餘兩一爲修拓巡海快船船臺並添蓋快船  
樣板房之欸此欸因前所造只費八十四一百五十四二百五十四七百五十四匹馬力各船所用現新造  
二千四百匹馬力快船殊不敷用若從新另造需費孔多故將一座舊船臺修理拓建並添蓋樣板房約  
用銀一千兩零呈請具奏前來經臣覆查無異除咨部查照並飭另行彙案造銷外合將應行照章聲明  
各欸緣由恭摺由驛四百里馳陳下部知之○甲午諭刑部奏遵旨定擬太監王來禾罪名一摺王來禾  
著貸其一死發往黑龍江永遠監禁遇赦不赦此係法外施恩嗣後太監如再犯偷竊之案定當執法嚴  
懲勿謂寬典可倖邀也○丙申諭翰林院侍讀盛昱奏兵部尙書彭玉麟奉命數月延不到任該尙書抗

詔鳴高不足勵仕途退讓之風反以開功臣驕蹇之漸請飭迅速來京等語前據彭玉麟奏請收回成命當經降旨諭令該尚書俟病體稍愈卽行來京日久未據奏報北上該尚書當已就痊著遵前旨卽行來京勿再遲延○諭御史黃兆燾奏請將陣亡殉難之外委等分別旌卹等語外委蕭翼駿並蕭葉氏沈陳氏均著交部分別旌卹○丁酉黃體芳奏查例載清釐籍貫區別流品責在廩保局中人不容遷就局外人更不得主張上年十一月據民人王匯川稟稱住居寶應置產完稅已逾百年身子壽民在寶與考三次本屆突有考童朱昭煌等以該民人身家不清由高郵朦冒寶籍控縣阻考來轅懇飭究誣等情臣檢閱呈到糧串實係住寶數世且與考查亦有年廩保從無異議因批飭寶應縣照舊收考旋據寶應廩生耿植等稟縣轉詳援引學政全書所載嘉慶九年歙縣職監江國龍之子江海寧不准在寄籍休寧考試一案爲同府不得移籍之證臣以其言有據隨於飭府議覆之後批令該童仍歸郵籍應試以符定例並查取該童前三次應考所有認派各保姓名分別飭懲以爲兩歧者戒詎本年三月間據署揚州府知府黃波轉據寶邑廩生刁崇謙等稟稱王姓土著已久請仍准入籍六月間又據該府等爲王壽民代求在寶應考試以順人情先後情節支離殊堪詫異臣訪聞詳悉王匯川以業賈積有餘資垂涎者衆而其中之忽操忽縱皆在籍候補道朱壽鏞陰主其事案關鄉紳把持學校不得不將先後原委據實上聞查

朱壽鏞籍隸寶應由諸生爲郎供職刑部奉 旨交河南軍營差遣歷保今職以丁憂回籍現已服闋上年臘月因<sub>臣</sub>批准王壽民考試意殊不平其時因事赴蘇道經常郡囑其親戚無錫縣知縣汪祖綬於公事稟函中附呈所繕節略一扣據稱王匯川係爲高郵皂役王松之兄身家不清前學政夏同善任內曾經生童呈控等語<sub>臣</sub>衙門存冊具在前院并無此案且兄弟本無相及之條又稱該縣訓導丁椿年與王匯川素有往來因令伊子冒考寶籍等語地方官查籍最嚴教官縱有私情豈守令甘坐通同之罪至云閩邑紳士均深惶悚不免挾衆爲名<sub>臣</sub>知其起意有因本年正月中旬出署試蘇舟過無錫面諭該縣以此事非該道所得干預宜令自重乃三月間寶應附貢祁炳文遣姪汝楫呈稱伊爲學徒王壽民試事與朱壽鏞口角因被誣陷蒙縣訪拿附呈該職親筆家信內有此事已回明撫院及藩臬兩司轉告學院批令該童原籍考試並囑其弟往晤知縣梁枚問其請飭該童歸籍詳文何以至今不出等語事涉招搖亟宜根究經<sub>臣</sub>檢錄原案行知江蘇按察司核案秉公質訊茲據江蘇按察司許應鏞會同江甯布政司梁肇煌轉據揚州府知府黃波委員候補知府楊峴將訊由詳覆前來<sub>臣</sub>查閱各件多與原案不符而朱壽鏞遣丁所遞親供謂係誣捏王姓考試職員並未與聞夫家信之真否原無確憑以職官非比士民可令當堂核對筆跡也至該職赴蘇前後張皇其事借以恫喝鄉愚實所不免今乃以並未與聞了之則節



略尙在臣手將誰欺乎查童生朱昭煌係朱壽鏞之姪此案先由該童發難廩生耿植等復隨而和之及集訊之時供稱童初次考試輕信人言王匯川父子身家籍貫之不清是以誤控夫以初試之童生輒敢掀拾傳聞倡行訐訟爲各廩生之前導非倚仗家勢而何而該職之節略中亦敘朱昭煌等稟縣一層但不明言其姪是該童之爲該職指使無疑矣廩生耿植朱壽鏞之妹婿也應充光緒五年恩貢迭催來考上年歲底據該縣以該生十月間患瘧疾十二月眠食俱廢病勢垂危等詞詳報臣如詳寬限並飭未考貢之前不准仍充廩保乃稟縣阻考一案該廩生卽係首名核其時日正在十二月病危期內考貢則邊巡落後控人則踴躍爭先而稟中情節與朱壽鏞節略大同小異是該廩生之爲該職慫恿無疑矣附貢生祁炳文以教唆詞訟經臬司札飭訪拿身在押所竟令其姪截人家信何等狡險原稟云事關各憲官聲未敢容隱明是脅制聲口何等刁悍忽因該府等據朱壽鏞家丁呈供驗明字跡低首下心遽供誤認誤控而稟中明有虛甘倍罪切供該府等亦絕不加詰竟謂所供近情請免置議意在袒護鄉紳因並開脫訟棍此中情弊灼然著明知府藐視學政猶可說也問官藐視上司不可言也近來承審官一味徇私此其佐證矣此案人證除祁炳文另有訪件應歸地方官懲治外其童生王壽民寄籍雖久有籍可歸原詳爲其父王匯川籲求在寶應試一節自難曲徇該童應照同府不准寄籍例擬仍飭回郵考試不得

再踰寶籍其應貢廩生耿植避貢與訟經臣批飭在案原詳僅敘該生阻考之故而於上年歲底患病告假緣由顛預不問該廩生應從寬照考貢有意宕延例開除廩缺永遠不准考貢其各廩保中王煥祖一名係初試所保廩生後復引學政全書赴縣具稟反覆已甚原詳未經剔出概據眾供書生未悉官書爲辭更屬矛盾該廩生應比照倩代等弊不及時舉出例從寬開廩降附童生朱昭煌前云據聞今云誤聞原詳供年二十九歲既非無知少年又係世家子弟豈外人所得而唆弄該童聽叔指揮於稟控冒籍外復以身家不清任意污衊照控告不實例擬從寬扣考一次以儆效尤以上皆學政應辦之事臣當按例飭行惟朱壽鏞職係監司士林屬目該郡人心浮動當思有以維持之區區寄籍一童生何至令舉國若狂纏擾不已始則餒弄繼則招搖終復推卸心術變幻居鄉如此何以居官然事或無關學校自有本省各大吏在非臣所知而考試係臣專司若皆由大鄉紳從中把持豈但學使無權將功令可以不遵士習必因之大壞且朱壽鏞呈臣節略倡言該童生王壽民考事其於被截家信何所顧忌至臨訊供單不但將此信脫卸並考事亦推未與聞難保無得賄轉圖情事現聞已赴河南臣以其職分不小未便再札兩司行文傳質如聽其逍遙事外無所儆懼而風氣所繫臣實不敢含糊其應如何示懲之處伏乞 飭下兩江總督江蘇巡撫調查臣衙門案卷核議覆奏候 旨施行以儆官邪而靖士氣 上諭黃體芳奏在

籍道員把持童試承審官過涉含糊請飭核議一摺據稱寶應重生朱昭煌等稟控王壽民冒考一案在籍候補道朱壽鏞陰主其事業據承審官會訊詳覆意在袒護鄉紳開脫訟棍等語著左宗棠衛榮光將此案確切查明核議具奏原摺著鈔給閱看將此各諭令知之○丁酉諭毓櫛等奏應行急修工程請派大臣查驗一摺 昭西陵隆恩殿等處工程現有滲漏坍塌情形 孝陵大碑樓垂脊被風刮落傷損簷瓦著派景善一併敬謹查勘具奏○諭毓櫛等奏上年因修永濟倉廩奏准由直隸藩庫借撥銀六千七百四十四兩零以備工需僅領到銀二千兩請飭全數撥發等語該處倉廩現在尙未竣工需款甚亟著李鴻章飭令藩司迅將欠發銀兩無論何款先行全數撥發俾資應用○以景廉爲內閣學士○戊戌諭前據已革御史載彩大理寺少卿劉緒先後奏參呼蘭協領巴彥孟庫於墾地一案設局斂資恣意誅求各節當諭令文緒確查具奏業據奏稱請將巴彥孟庫先行解任歸案質證茲據文緒等奏稱據稱已革鄉約潘廷恩於光緒五年九月間斂錢進京面見御史英俊交付銀兩商辦條奏並有部書金姓設法求免花利各事民人張作霖呈出信件附有英俊奏底核與六年九月間該御史奏請查辦開禁通肯荒場鈔給定安賜看之件相符等語案關言官得賄句串亟應澈底根究著刑部於此案要犯潘廷恩等解到時確切嚴訊據實具奏御史英俊著該旗卽行看管聽候質訊載彩劉緒有無別項情節並著聽候傳質

○壬寅賞給京師八旗及綠步各營官兵及食餉之間散宗室覺羅人等並宗室覺羅孤寡半月錢糧五城粥廠命加展兩月先期開放○諭本年六月以來雨水過多前於上月二十九日親詣大高殿拈香並派惇親王奕諒等分詣時應宮等處拈香仰蒙 昊慈眷佑卽日晴霽寅感實深日來又復大雨誠恐秋稼有傷廬念民依曷勝焦灼允宜虔申祈禱以冀時暘謹擇於二十六日朕親詣大高殿拈香時應宮著派惇親王奕諒 昭顯廟著派恭親王奕訢 宣仁廟著派惠郡王奕詳 凝和廟著派貝勒載澂同於是日分詣拈香以迓天和○諭科道爲朝廷耳目之官補闕拾遺是其專責宜如何砥礪廉隅束身自愛茲據御史劉恩溥奏滿漢科道賢否不齊難保無宵小私作摺底借名撞騙等語此風斷不可長嗣後如有攜帶摺底向人恐嚇者准將原人原稿扣住卽送交該地方官從嚴懲辦以儆刁風該科道等亦當各加慎密自顧聲名庶不致爲旁人所影射也○諭御史劉恩溥奏京城旗民婦女開設煙館賭局等情蘇州上海杭州等處亦有婦女開設煙館拐販情事請將犯罪婦女量予監禁等語著刑部妥議章程具奏○諭給事中鄔純嘏奏請旌表貞節婦女等語李祝氏閻尹氏吳周氏韓秦氏吳王氏吳李氏吳馮氏均著准其旌表○諭前因張樹聲奏調已革鹽運使洪汝奎差委當經降旨允准旋據張之洞奏調仍諭令發往廣東差遣茲據光祿寺少卿延茂戶科給事中鄔純嘏先後奏稱廢員棄瑕錄用臣下